



Na osnovu člana 17. stav 1. i člana 44. stav 1. Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine”, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24 i 72/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu, sudija Halil Lagumdžija, predsjednik Vijeća, sutkinja Aleksandra Obradović i sutkinja Sanela Gorušanović - Butigan, potpredsjednice Vijeća, te tužiteljica Bojana Jolović, tužiteljica Snježana Petković, advokatica mr. Duška Bogojević, sudija Mustafa Šabić, tužilac Saša Sarajlić, sutkinja Ljiljana Bošnjak - Glizijan, prof. dr. Džamna Vranić, advokat dr. sc Davor Martinović, tužiteljica Željka Fabić, advokatica Elma Veledar Arifagić i sudija Velimir Ninković, na sjednici održanoj 05. i 07.02.2025. godine, donijelo je

## **R J E Š E N J E** **o imenovanju sudije Vrhovnog suda Federacije BiH**

- I. Za sudiju Vrhovnog suda Federacije BiH imenuje se **Hubjer Naida**.
- II. Datum stupanja na dužnost imenovane Vijeće će odrediti posebnom odlukom.

### **O b r a z l o ž e n j e**

Na osnovu člana 36. Zakona o VSTV-u BiH i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je dana 07.11.2024. godine, na internet stranici Vijeća objavilo javni konkurs pod brojem: 04-07-3-4035-1/2024, kojim je oglašena jedna (1) pozicija sudije Vrhovnog suda Federacije BiH, sa iskustvom na krivičnom referatu. Navedena sudijska pozicija, koja je prethodno bila oglašena konkursom, broj: 04-07-3-188-1/2024 od 15.01.2024. godine, ponovljena je odlukom Vijeća koja je donesena na sjednici održanoj 04.06.2024. godine, iz razloga propisanih članom 62c. stav (1) tačka b) Poslovnika VSTV-a BiH.

Nakon provedene konkursne procedure, nadležno podvijeće je u skladu sa članom 59b. st. (1), (2) i (4) Poslovnika VSTV-a BiH izvršilo finalno rangiranje kandidata, te je Vijeću dostavilo rang listu kandidata sa obrazloženim prijedlogom za postupanje.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i Poslovnikom VSTV-a BiH, Vijeće je odlučilo da na poziciju sudije Vrhovnog suda Federacije BiH imenuje kandidatkinju na rang listi pod rednim brojem 2 Hubjer Naidu iz reda bošnjačkog naroda, koja od 15.04.2010. godine obavlja dužnost sudije Osnovnog suda u Foči. U periodu od 01.01.2020. g. do 30.06.2024. godine, obavljala je dužnost predsjednika tog Suda.

Prethodno imenovanju na poziciju sudije Osnovnog suda u Foči, imenovana kandidatkinja je u periodu od 2006. g. do 2010. g. obavljala poslove državnog službenika, rukovodioca u Općinskom sudu u Goraždu, a u periodu od 2005. g. do 2006. g. obavljala je poslove višeg stručnog saradnika u Udruženju Vaša prava BiH. U periodu od 2002. g. do 2004. g. obavljala je poslove pravnog referenta u JZU Kantonalna bolnica Goražde, a u periodu od 2001. g. do 2002. g. poslove referenta u Centru za pružanje besplatne pravne pomoći.

Vijeće je nakon ocjene stručne sposobnosti kandidatkinje zasnovane na dosadašnjim rezultatima u karijeri, sposobnosti pravne analize, komunikativnosti i sposobnosti prezentacije, sposobnosti kandidatkinje da odgovorno, nezavisno i nepristrasno obavlja funkciju sudije, uzimajući u obzir, između ostalog, dosadašnje radno iskustvo kandidatkinje, profesionalnu nepristrasnost i ugled, ponašanje van posla, edukaciju i usavršavanje, objavljivanje stručnih i naučnih radova, te druge aktivnosti u struci i ocjene kriterija podobnosti, ocijenilo da imenovana kandidatkinja u potpunosti ispunjava uslove za imenovanje propisane u članu 43. Zakona o VSTV-u BiH.

Kada je u pitanju broj ostvarenih bodova, Vijeće je imalo u vidu da je imenovana kandidatkinja u toku konkursne procedure, u pogledu bodova za kriterij stručnosti i sposobnosti pravne analize ostvarila ukupno 96 bodova od mogućih 100 bodova, dok je na razgovoru pred nadležnom komisijom Vijeća u pogledu drugih kriterija ostvarila ukupno 12,9 bodova od mogućih 20 bodova, što ju je u konačnici rangiralo na drugom mjestu rang liste kandidata sa ukupno ostvarenih 108,9 bodova od mogućih 120 bodova.

Kriteriji stručnosti i sposobnosti pravne analize imenovane kandidatkinje, koja već obavlja dužnost sudije, utvrđeni su na osnovu ocjene rada za posljednje tri godine za koje je ocijenjena, i to za 2021. g., 2022. g. i 2023. g., a računajući do dana isteka roka za podnošenje prijave po navedenom konkursu.

Na osnovu ocjena rada za 2021. g., 2022. g. i 2023. g., odnosno ocjena 4, 5 i 5, utvrđeno je da je kandidatkinja za navedene tri godine za koje je ocijenjena ostvarila prosjek od 4,7. Prema odredbama člana 56. stav 2. Poslovnika VSTV-a BiH, njenoj prosječnoj ocjeni rada za prethodne tri godine koja iznosi 4,7 dodijeljen je ekvivalentan broj bodova koji se koristi u natječajnoj proceduri od 96 bodova.

Ostali kriteriji, koji se odnose na sposobnost kandidatkinje da odgovorno, nezavisno i nepristrasno obavlja funkciju za koju se prijavila, profesionalne nepristrasnosti i ugleda, te ponašanja van posla, dosadašnjeg radnog iskustva kandidatkinje, edukacije i usavršavanja, objavljivanja stručnih i naučnih radova, te drugih aktivnosti u struci i komunikativnosti utvrđeni su na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54., 54a., 54d., 54e. i 54f. Poslovnika VSTV-a BiH, pri čemu je kandidatkinja po tom osnovu u konačnici ostvarila ukupno 12,9 bodova. Konačan broj bodova koje kandidat ostvari na razgovoru predstavlja prosjek zbira ocjena po kriterijima koji se ocjenjuju na razgovoru.

Pored ukupnog broja ostvarenih bodova, na osnovu kojih je kandidatkinja u skladu sa čl. 59a. stav (1) tačka c) i 59b. st. (2) i (4) Poslovnika VSTV-a BiH stekla uslove za predlaganje i imenovanje na poziciju sudije vrhovnog suda, Vijeće je vodilo računa o okolnostima koje su relevantne za procjenu podobnosti kandidatkinje iz člana 48a. ovog poslovnika, kao i o potrebi osiguranja adekvatne nacionalne i spolne zastupljenosti u navedenom sudu, u smislu člana 43. stav (2) Zakona o VSTV-u BiH.

Vijeće je prilikom imenovanja navedene kandidatkinje ocijenilo da ne postoje okolnosti koje izazivaju sumnju u pogledu podobnosti kandidatkinje za poziciju za koju se prijavila.

Adekvatna nacionalna zastupljenost u konkretnom sudu utvrđena je na osnovu popisa stanovništva iz 1991. godine. Nacionalna struktura 58 sudija, prema popisu stanovništva iz 1991. godine, bi trebala biti: Bošnjaci (30,3), Hrvati (12,8), Srbi (10,2), Ostali (4,7). Trenutna nacionalna struktura 51 sudija je: Bošnjaci (30), Hrvati (6), Srbi (11), Ostali (4). Prema prethodno navedenoj nacionalnoj strukturi u Vrhovnom sudu Federacije BiH nedostaje kandidata iz reda bošnjačkog naroda (- 0,3), hrvatskog naroda (- 6,8), ostalih (- 0,7), dok je kandidata iz reda srpskog naroda (+ 0,8).

Uzimajući u obzir trenutnu nacionalnu strukturu u navedenom sudu, Vijeće je u konkretnom slučaju za poziciju sudije navedenog suda imenovalo kandidatkinju koja dolazi iz reda bošnjačkog naroda. U vezi s tim, Vijeće je uzelo u obzir činjenicu da se radi o ponovljenom konkursu, te da na rang listi kandidata, shodno članu 59b. stav (2), između kojih se vršio izbor, nije bilo kandidata iz reda hrvatskog naroda i ostalih.

Imajući u vidu potrebu navedenog suda za sućem sa specifičnim radnim iskustvom, koja je utvrđena u skladu sa članom 34. stav (1) tačka g) i članom 34a. stavak (3) Poslovnika VSTV-a BiH, Vijeće je vodilo računa i o radnom iskustvu kandidatkinje u određenoj oblasti prava, te je cijeno da imenovana kandidatkinja obavljajući dužnost sudije u Osnovnom sudu u Foči na krivičnom referatu posjeduje traženo iskustvo na krivičnom referatu. Okolnosti koje se tiču radnog iskustva imenovane kandidatkinje utvrđene su na osnovu informacija pribavljenih na razgovoru sa kandidatom, u skladu sa članom 53. stav (11) Poslovnika, te uvidom u službene evidencije Vijeća.

Shodno odredbama člana 62. stav (2) Poslovnika VSTV-a BiH, Vijeće je u odnosu na kandidatkinju sa rang liste pod rednim brojem 1 dalo prednost kandidatkinji na rang listi pod rednim brojem 2 Hubjer Naidi iz slijedećih razloga:

Vijeće je prije svega cijeno da je kandidatkinja sa rang liste pod rednim brojem 1, koja dolazi iz reda bošnjačkog naroda, kao i imenovana kandidatkinja u toku konkursne procedure po kriterijumima koji se primjenjuju prilikom ocjene uspjeha postignutog u konkursnoj proceduri, kako u pogledu kriterijuma koji se ocjenjuju na osnovu ocjene rada kandidata u prethodnom relevantnom periodu ili na osnovu kvalifikacionog i pismenog testiranja, tako i u pogledu kriterijuma koji se ocjenjuju na razgovoru sa kandidatima, ostvarile potreban uspjeh za imenovanje na poziciju sudije vrhovnog suda. Dakle, obje navedene kandidatkinje su u skladu sa odredbama člana 59a. stav (1) tačka c) i člana 59b. stav (2) i (4) Poslovnika VSTV-a BiH, a u vezi sa članom 61. istog poslovnika stekle uslove za predlaganje i imenovanje na poziciju sudije Vrhovnog suda Federacije BiH.

Obzirom na činjenicu da je imenovanja kandidatkinja ostvarila manji broj bodova (108,90 bodova) od kandidatkinje na rang listi pod rednim brojem 1 koja je ostvarila 112,90 bodova, Vijeće je zaključilo da je takav položaj kandidata na rang listi posljedica male razlike u ukupno ostvarenim bodovima (4 boda), koja u konkretnom slučaju ne ukazuje na stvarnu razliku u kvaliteti u korist kandidatkinje pod rednim brojem 1 rang liste.

Navedena razlika u bodovima (4 boda) je rezultat bodovanja kriterija stručnosti i sposobnosti pravne analize, koji su utvrđeni na osnovu ocjene rada za posljednje tri godine za koje su kandidatkinje ocijenjene, računajući do dana isteka roka za podnošenje prijava.

Po kriteriju stručnosti i sposobnosti pravne analize kandidatkinja na rang listi pod rednim brojem 1 ostvarila je ukupno 100 bodova, dok je imenovana kandidatkinja ostvarila ukupno 96 bodova od mogućih 100 bodova, što je u konkretnom slučaju neznatna bodovna razlika za navedeni kriterij.

Kada su u pitanju kriteriji koji se utvrđuju na osnovu razgovora pred nadležnom komisijom Vijeća, Vijeće je uzelo u obzir činjenicu da su obje kandidatkinje ostvarile identičan broj od 12,9 bodova od mogućih 20 bodova.

Vijeće je nakon sveobuhvatne rasprave konstatovalo da se u konkretnom slučaju radi o približno jednakim kandidatkinjama sa uspješnom profesionalnom karijerom, koje u svom radu primjenjuju propise iz krivičnopravne oblasti. Prvorangirana kandidatkinja trenutno obavlja dužnost tužioca Kantonalnog tužilaštva Kantona Sarajevo u odjelu za opći kriminalitet, dok drugorangirana kandidatkinja obavlja dužnost sudije u Osnovnom sudu u Foči na krivičnom referatu. Osim toga, obje kandidatkinje su određeni period u svojim institucijama obavljale dužnost glavnog tužioca, odnosno predsjednika suda.

U takvim okolnostima, Vijeće je u odnosu na kandidatkinju na rang listi pod rednim brojem 1, dalo prednost kandidatkinji na rang listi pod rednim brojem 2, uzimajući u obzir činjenicu da je imenovana kandidatkinja Hubjer Naida na razgovoru sa članovima Komisije, na kojem se razmatralo i vrednovalo sposobnost kandidata da odgovorno, nezavisno i nepristrasno obavlja funkciju za koju se prijavio, profesionalne nepristrasnosti i ugleda, te ponašanja van posla, dosadašnjeg radnog iskustva kandidata, edukacije i usavršavanja, objavljivanja stručnih i naučnih radova, te drugih aktivnosti u struci i komunikativnosti, ostavila dojam da se radi o kandidatkinji od koje se, u konkretnom slučaju u većoj mjeri

može očekivati da će uspješno, stručno i savjesno obavljati sudijsku dužnost u Vrhovnom sudu Federacije BiH.

Neposredan kontakt sa imenovanom kandidatkinjom, pred nadležnom komisijom Vijeća za obavljanje razgovora, pokazao je na strani imenovane kandidatkinje prednost u odnosu na kandidatkinju pod rednim brojem 1 sa rang liste.

Vijeće je ocijenilo da imenovana kandidatkinja posjeduje potrebno stručno znanje, kao i potrebno radno iskustvo, te da ispunjava sve uslove da obavlja poziciju sudije Vrhovnog suda Federacije BiH, a to posebno cijeneći njeno dosadašnje radno iskustvo koje je sticala u svojstvu sudije na krivičnom referatu, i to kao sudija pojedinac, predsjednik krivičnog vijeća, sudija za prethodni postupak i sudija za maloljetnike. Kandidatkinja na rang listi pod rednim brojem 1 je tokom svoje profesionalne karijere isključivo obavljala poslove u okviru tužilačkog sistema, koja za razliku od imenovane kandidatkinje nema nikakvo sudijsko iskustvo.

Uzimajući u obzir navedeno, Vijeće je kumulativno vodeći računa o svim okolnostima iz člana 59b. stav (5) tač. a), b), c) i d) Poslovnika VSTV-a BiH, ocijenilo da je imenovana kandidatkinja u potpunosti ispunila zakonom propisane uslove, kao i druge kriterije koji se cijene prilikom izbora kandidata, kako bi bila imenovana za sudiju Vrhovnog suda Federacije BiH.

Shodno odredbama člana 44. stav (6) Zakona o VSTV-u BiH, u slučaju pokretanja upravnog spora za ovu poziciju se odgađa stupanje na funkciju novoimenovanog sudije, dok se ne okonča sudski postupak.

U skladu sa odredbama člana 2. Zakona o izmjeni Zakona o Visokom sudskom i tužilačkom vijeću Bosne i Hercegovine („Službeni glasnik BiH“ br. 50/24) sva lica imenovana u periodu od 23. marta 2024. do 28. februara 2025. mogu stupiti na dužnost, a provjera njihovih izvještaja o imovini i interesima bit će izvršena nakon uspostavljanja Odjela za provođenje postupka po izvještajima. Ako ishod provjere bude negativan, bit će pokrenut disciplinski postupak u skladu sa pravilima iz člana 86d. st. (3), (4) i (5).

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

**Pouka o pravnom lijeku:** Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-736-1/2025

Datum: 05.02.2025. godine

